

## Cinq dwègts : one mwin

Astampé, c'è-st-on complumint.  
Dîreut-on nin qu'i r'waîte è l'aîr ?  
Toûrné po d'tchinde, c'èst tot l' contraîre,  
Si bin minâbe, on mwins' qui rin.

Tinkyî, choyu, i v' vout mostrer  
Qu'èvoyî l's-ôtes aus sèt' cints diâles,  
Qui criyî : "qu'i vonche al surâle !"  
C'èst toûrner l' dos à l'amisté.

Drèssî, mon dès mau-èlèvés,  
Tot l' monde sét bin ç' qui ça vout dîre ;  
Avou dès mots, ç' sèreut co pîre !  
Fians l'înocint, lèyans lès fé.

C'è-st-avou l' bague qu'on l'a gârni.  
Gârni ? Nin si sûr ! À m' chonance,  
S'on-z-a lomé ça "Aliyance",  
Ça vout dîre : "Cor onk di r'loyî !"

"Donez m' one miète vosse pitit dwègt"  
D'djeut-èle, nosse man, quand dj' rodjicheûve,  
Qu'elle ènn'èsteut sûre, qui dj' boûrdeûve :  
Tot paf, l'ome, èstô d' fé l' kèkèt !

C'èst lès cinq dwègts qu'ont d'né al mwin  
Tot ç' qu'i faleut po s' fé ètinde.  
Ele n'è saureut pont dîre, di mintes.  
Sayîz ! Vos vièroz qu' ça n' prind nin...

Insi, chaque côp qu'on-z-a man'cî  
D' vos mète cinq dwègts èvou qui dj' pinse,  
Rin d' tél po fé djoker l' faîtinse :  
Avou ça, nin dandjî d' criyî.

Mins maugré ça, po bin mostrer  
À Djan ou Djène qu'on l' vwèt voltîy,  
C'èst co lès dwègts qu'ont l' pus aujîy  
Po s' fé comprinde sins d'vu d'viser.

Troverîz bin one saqwè d' pus bia  
Qui deûs mwins aclapéyes èchone ?  
Quî èst ç' qui r'çût, quî èst ç' qui done ?  
L' amisté vaut tos lès solias !

Albert Delvaux